

आकाशवाणी जयपुर-अजमेर
प्रादेशिक समाचार

- अंता विधानसभा सीट माथे उपचुनाव सारू पड्या वोटों री गिणती काल संवारे 8 बज्यां सरू व्हेला।
- विकसित भारत रोजगार योजना रा तैत देश मांय साढ़े 55 हजार ऊं बत्ता संस्थान अर 38 लाख 84 हजार नौजवान नाम मंडाया।
- मुख्यमंत्री भजनलाल शर्मा दिल्ली मांय आवासन अर शहरी कार्यमंत्री अर जलशक्ति मंत्री सागे मुलाकात कर र प्रदेश ऊं जुड्या न्यारा-न्यारा मुद्दां माथे चर्चा कीनी।
- राष्ट्रीय जल पुरस्कारां रा तैत प्रदेश ने चार ईनाम दे र नवाजी ज्यो।

000

बारां जिला रा अंता विधानसभा हलका मांय उपचुनाव सारू 11 नवम्बर ने पड्या वोटों री गिणती काल करी जावेला। ओ काम बारां रा राजकीय स्नातकोत्तर महाविद्यालय मांय कर्यो जावेला। संवारे आठ बज्यां सरू व्हेवण वाळी गिणती रा तैत सब ऊं पैली डाक मतपत्रां री गिणती करी जावेला।

000

प्रधानमंत्री विकसित भारत रोजगार योजना रा तैत चलायी ज्यो कर्मचारी नामांकन अभियान मांय आखा देश मांय साढ़े 55 हजार ऊं बत्ता संस्थान अर 38 लाख 84 हजार लोग नाम मंडाया है। कर्मचारी भविष्य निधि संगठन-ईपीएफओ रा राजस्थान अंचल रा प्रभारी अर अपर केंद्रीय आयुक्त अजीत कुमार बतायो के प्रधानमंत्री विकसित भारत रोजगार योजना रा तैत राज्य मांय करीब पौने छह हजार संस्थान अर 1 लाख 33 हजार सदस्य नाम मंडाया है। अजीत कुमार बतायो के 1 अगस्त ऊं चलायी ज्यो ई योजना रो मकसद नौकरी-धंधा रा मौका पैदा करण ने बधावो देवण सागे कामगारां री सामाजिक सुरक्षा तैय करणो है।

000

प्रधानमंत्री नरेन्द्र मोदी 30 नवम्बर दीतवार ने आकाशवाणी ऊं प्रसारित कर्या जावण वाळा खास कार्यक्रम “मन की बात” मांय विचार बतावेला। आ हर महीना प्रसारित कर्या जावण वाळा ई कार्यक्रम री 128वीं कड़ी व्हेला। ई सारू राय 28 नवम्बर ताई मुफ्त नम्बर 1800-11-7800 माथे दी जा सके है। नरेन्द्र मोदी एप अर माय जीओवी ओपन फोरम रे जरिये ई विचार दिया जा सके है।

000

जयपुर मांय 10 दिसम्बर ने व्हेवण वाळा ‘प्रवासी राजस्थानी दिवस’ रे दौरान प्रवासी राजस्थानियां सागे खास सत्र राख्या जावेला, ज्यां मांय प्रवासी राजस्थानी, उद्योग जगत रा नुमाइंदा अर न्यारा-न्यारा हलकां रा नीति बणावण वाळा शामिल व्हेला। उद्योगां रा बारा मांय राख्या जावण वाळा खास सत्र मांय प्रवासी राजस्थानियां सागे राजस्थान री उद्यमशीलता अर पारिस्थितिकी तंत्र ने मजबूत बणावण रा बारा मांय चर्चा करी जावेला। सैर-सपाटा रा हलका रा बारा मांय विचार रे दौरान विरासत, सांस्कृतिक अर पर्यावरणीय पर्यटन हलका मांय नुवा आयाम अर शेखावाटी हलका री मान्योड़ी हवेलियां रा बारा मांय खास ध्यान दियो जावेला।

000

सरदार वल्लभभाई पटेल री डोढ़ सौ वीं जयंती रा तैत राख्या जा रह्या कार्यक्रमों रा सिलसिला मांय प्रदेश मांय न्यारी-न्यारी ठोड़ां आज एकता दौड़ राख्यी ज्यी। कोटा जिला रा सांगोद मांय गांधी चौराहा ऊं शहीद हेमराज मीणा स्मारक ताई यूनिटी मार्च निकाळी ज्यो। इण ऊं पैली सांगोद रा छोटा फील्ड मांय लोकसभा अध्यक्ष ओम बिरला 28 करोड़ 74 लाख रुपया ऊं बत्ता खर्च वाळा विकास रा कामां री नींव रखी अर पूरा व्ह्या काम जनता ने सूंप्या। ई मौके वे कहयो के चुनौतियां मुश्किल व्हे सके है, पण संकल्प अर देश रा प्रति समर्पण रे जरिये लक्ष्य हासिल कर्यो जा सके है।

डूंगरपुर जिला रा सागवाड़ा मांय नगरपालिका ऊं निकाळी ज्यो यूनिटी मार्च शहर रा न्यारा-न्यारा गेला ऊं व्हेतो निकळ्यो। इण मांय विधायक शंकरलाल डेचा, पैली वाळा सांसद कनकमल कटारा, जनता रा नुमाइंदा अर मोटी तादाद मांय जनता शामिल व्ही।

000

भगवान बिरसा मुंडा री डोढ़ सौ वीं जयंती रा सिलसिला मांय राज्य मांय न्यारा-न्यारा कार्यक्रम राख्या जा रह्या है। सवाईमाधोपुर जिला मांय आज स्वायत्त शासन विभाग री ओर ऊं शहर रा खास चौराहां, भवनां अर बाग-बगीचा मांय सजावट करीजी। सिरोही जिला मांय स्वास्थ्य शिविर लगायी ज्यो, ज्यां मांय अढ़ाई हजार ऊं बत्ता लोग मुफ्त स्वास्थ्य सेवावां रो फायदो उठायो।

000

राष्ट्र गीत वंदे मातरम् रा डोढ़ सौ साल पूरा व्हेवण रा सिलसिला मांय प्रदेश मांय भांत-भांत रा कार्यक्रम राख्या जा रह्या है। महिला अर बाल विकास विभाग रा तैत प्रदेश री 63 हजार ऑगनबाडियां मांय आज बच्चा मिल र वंदे मातरम्

गायो। आईसीडीएस रा निदेशक वासुदेव मालावत बतायो के देशभक्ति री भावना जगावण सारू वन्देमातरम गीत गावण सागे स्वतंत्रता सेनानियां ने याद करी ज्या।

बालोतरा जिला री सरकारी अर गैर—सरकारी स्कूलां मांय स्वदेशी संकल्प गोष्ठियां राख्यी ज्यी, ज्यां मांय विद्यार्थी अर शिक्षक मिल र देश ने खुद रे पाण ऊबो करण सारू समर्पित भाव ऊं काम करण री शपथ लीनी। कार्यक्रमों री सुरुआत मांय सगळी स्कूलां मांय वंदे मातरम् गीत गायी ज्यो। जालौर जिला री स्कूलां, छात्रावासां अर मदरसां मांय ई मिल र वंदे मातरम् गायी ज्यो अर देश मांय बणी चीजां काम लेवण रो संकल्प करी ज्यो।

000

मुख्यमंत्री भजनलाल शर्मा आज दिल्ली मांय केई केंद्रीय मंत्रियां अर भारतीय जनता पार्टी रा आला नेतावां सागे मुलाकात कीनी। वे ऊर्जा, आवासन अर शहरी कार्य मंत्री मनोहर लाल सागे मुलाकात कर र जयपुर मेट्रो रेल रा दूजा फेज रा काम री मंजूरी, बिजली हलका मांय विकास अर ग्रीन एनर्जी कॉरिडोर रा तैत प्रदेश मांय बिजली मुहैया करावण रो काम और बेहतर बनावण रा बारा मांय चर्चा कीनी। मुख्यमंत्री जल शक्ति मंत्री सी.आर. पाटील सागे ई मुलाकात कर र राज्य रा जल संसाधन ऊं जुड़्या न्यारा—न्यारा मुद्दां माथे चर्चा कीनी।

000

राष्ट्रीय जल पुरस्कारां रा तैत राजस्थान ने चार ईनाम दिया ज्या है। सीकर रा बजरंग लाल जैतू ने पाणी रा हलका मांय बेहतरीन काम करण वाळा रो पहलो ईनाम दियो ज्यो। श्री जैतू साल 1993 ऊं पाणी बचावण अर प्रबंधन रा हलका मांय लगातार काम कर रह्या है। श्रीगंगानगर जिला रा खरलां जल उपभोक्ता संगम ने सब ऊं चोखा जल उपयोगकर्ता संघ श्रेणी मांय तीजो ईनाम दियो ज्यो। ई संघ रा काम ऊं जनता मांय पाणी रा महत्त्व रा बारा मांय जागरुकता आई है। बिरला प्रौद्योगिकी अर विज्ञान संस्थान, पिलानी स्कूल अर कॉलेज सागे सब ऊं चोखा संस्थान री इनसाइड कैपस उपश्रेणी मांय दूजो अर अंबुजा फाउण्डेशन, जयपुर सर्वश्रेष्ठ नागरिक समाज श्रेणी मांय ईनाम जीत्या। मुख्यमंत्री भजनलाल शर्मा जीतण वाळां ने बधाई देता थकां कह्यो के पाणी बचावण अर भेळो करण रा हलका मांय राज्य री नुवी ओळखाण बण रही है।

000

उपमुख्यमंत्री अर पर्यटन, कला अर संस्कृति मंत्री दिया कुमारी कह्यो है के राजस्थान री ओळखाण वां री रंग—बिरंगी संस्कृति, समृद्ध रिवाज, लोकनृत्यां अर लोक भावनावां मांय बसे है। वे आज जयपुर मांय घूमर फेस्टीवल—2025 रा पोस्टर रा विमोचन जळसा मांय बोल रही ही। दिया कुमारी कह्यो के घूमर केवल एक नाच नहीं बल्कि राजस्थान री आत्मा है। वे कह्यो के कला, संस्कृति अर पर्यटन विभाग रे जरिये 19 नवम्बर ने पहली दफा घूमर फेस्टिवल राख्यो जावेला। उपमुख्यमंत्री बतायो के घूमर महोत्सव—2025 राज्य रा सात ई संभाग मुख्यालयां माथे एक ही दिन एक ही बगत राख्यो जावेला। राज्य स्तर रो जळसो जयपुर रा विद्याधर नगर स्टेडियम मांय व्हेला। दिया कुमारी बतायो के ई फेस्टिवल मांय 12 साल ऊं बत्ती उम्र री टाबरियां अर महिलावां शामिल व्हे सके है।

000

पाली मांय स्वच्छ भारत मिशन रा तैत जिला कलेक्टर एल.एन. मंत्री रामसेतु की गिलहरी नाम रो नुवो अभियान चलायो है। ई रा तैत जनता मांय साफ—सफाई रा बारा मांय जाग जगावण सारू न्यारा—न्यारा कार्यक्रम राख्या जा रह्या है। सुमेरपुर रा विकास अधिकारी प्रमोद दवे बतायो के अभियान रा तैत खास तौर ऊं प्लास्टिक कचरो भेळो करण माथे ध्यान दियो जावेला।

000